

《中國地方藝文薈萃》編輯會 編

學苑出版社

中國地方藝文薈萃

藝文卷·第一輯 詞

華東卷・第一輯

捌

中國地方藝文薈萃

《中國地方藝文薈萃》編委會

編

# 第八冊目錄

|                  |           |    |
|------------------|-----------|----|
| 貴池唐人集十六卷伍喬詩一卷(二) | · · · · · | 一  |
| 居鄭詩徵十卷(一)        | · · · · · | 一一 |

貴池唐人集十六卷伍喬詩一卷（二）

貴池唐人集十六卷伍喬詩一卷（二）

（清）劉世珩輯

據清光緒三十一年（一九〇五）刻本影印。

顧雲詩

貴池唐人集第八

顧雲字垂象池州人風韻詳整與杜荀鶴殷文珪友善同肄業九華咸通十五年登第爲高駢淮南從事師鐸之亂退居雪川杜門著書大順中與羊昭業盧知猷陸希聲錢翊馮渥司空圖等分修宣懿德三朝實錄書成加虞部員外郎乾甯初卒存詩一卷

七言古詩

華清詞

祥雲皓鶴盤碧空喬松稍稍韻微風絳節影來朱旛響丁東相公清齋朝藥宮太上符籙龍蛇蹤散花天女侍香童隔煙遙望見雲水彈璫吹鳳清瓏瓏丹砂黃金世可度願啟一言告仙翁道門弟子山中客長向山中禮空碧九色真龍上漢時願把霓幢引煙策

天威行

蠻嶺高蠻海闊去舸迴艘投此歇一夜舟人得夢閒草草相  
呼一時發颶風忽起雲顛狂波濤擺掣魚龍殭海神怕急上  
岸走山靈股慄入石藏金蛇飛狀霍閃過白日倒挂銀繩長  
轟轟砢砢雷車轉霹靂一聲天地戰風定雲開始望看萬里  
青山分兩片車遥遥馬闐闐平如砥直如弦雲南八國萬部  
落皆知此路來朝天耿恭拜出井底水廣利刺開山上泉若  
論終古濟物意二將之功皆小焉

築城篇

三十六里西川地圍繞城郭幾天橫一家人率一口甓版築  
纔興城已成役夫登登無倦色饌飽觴酣方暫息不假神龜  
出指蹤盡憑心匠爲籌畫畫閣團團真鐵甕堵闊巉巖一作巉  
齊石壁風吹四面旌旗動火燄相燒滿天赤散花樓晚挂殘

虹濯錦秋江澄倒碧西川父老賀子孫從茲始是中華人

蘇君廳觀韓幹馬障歌

杜甫歌詩吟不足可憐曹霸丹青曲直言弟子韓幹馬

一作畫

畫馬無骨但有肉今日披圖見筆跡

一作蹤

始知甫也真凡目

秦王學士居武功六印名家聲價雄乃孫屈跡甯百里好奇  
學古有祖風竹廳斜日弈碁散延我直入書齋中屹然六幅  
古屏上歟見胡人牽入天廡之神龍麟鬐鳳臆真相似秋竹  
慘慘披兩耳輕勻杏葉糝皮毛細撚銀絲插駿尾思量動步  
應千里誰見初離渥洼水眼前只欠燕雪飛蹄下如聞朔風  
起朱崖謫掾從亡歿更有何人鑒奇物當時若遇燕昭王肯  
把千金買枯骨

苔歌

檻前溪奪秋空色百丈潭心數砂礫松筠

一作籟

條條長碧苔

苔色碧於溪水碧波迴梳開孔雀尾根細貼著盤陀石撥浪  
輕拈出少時一髻濃煙三四尺山光日華亂相射靜縷藍髻  
勻鬟積試把臨流一作風抖擻看琉璃珠子淚雙雙一作雙滴如看  
玉女洗頭處解破雲鬟收未得即是仙宮欲製六銖衣染絲  
未倩鮫人織采之不敢盈筐篋苦怕龍神河伯惜瓊蘇玉鹽  
爛漫煮嚙入丹田續靈液會待功成插翅飛蓬萊頂上尋仙  
客

池陽醉歌贈匡廬處士姚巖傑

九華太守行春罷一作暇高絳紅筵壓花榭四面繁英拂檻開  
帖雪團霞墜枝亞空中燄若燒藍天萬里滑靜無纖煙弦索  
緊快管聲脆急曲碎拍聲相連主人憐才多傾興許客酣歌  
露真性春耐香濃枝盞黏一醉有時三日病黿潭鱗粉解不  
去鴉嶺藥花澆不醒肺枯似著爐鞴煽腦熱如遭鎚鑿釘蒙

溪先生梁公孫忽然示我十軸文展開一卷讀一首四顧特  
地無涯垠又開一軸讀一帙酒病豁若風驅雲文鋒幹破造  
化窟心刃掘出興亡根經疾史恙萬片恨墨炙筆鉞如有神  
呵叱潘陸鄙瑣屑提挈楊孟歸孔門時時說及開元理家風  
颯颯吹人耳吳兢纂出升平源十事分明鋪在紙裔孫才業  
今如此誰人爲奏明天子鑾駕何當獵左馮神鷹一擲望千  
里戲操狂翰浣蠻牋傍人莫笑我率然

七言律詩

詠柳

帶露含煙處處垂綻黃搖綠嫩參差長隄未見風颺絮廣陌  
初憐日映絲斜傍畫筵偷舞態低臨妝閣學愁眉離亭不放  
到春暮折盡拂簷千萬枝

七言絕句

詠柳

閒花野草總爭新  
眉皺絲乾獨不勻  
乞取一作與東風殘氣力  
莫教虛度一年春

顧雲文

貴池唐人集第九

代高駢上僖宗奏

臣伏奉詔命令臣自省更勿依違者臣仰天訴地血淚交流如劍戟攢心若湯火在己只如黃巢大寇圍逼天長小城四旬有餘竟至敗走臣散徵諸道兵甲盡出家財賞給而諸道多不發兵財物即爲己有縱然遣使徵得敕旨不許過淮其時黃巢殘凶纔及二萬經過數千里軍鎮盡若無人只如潼關已東只有一徑其爲險固甚於井陘豈有狂寇奔衝畧無阻礙即百二之地固是虛言神策六軍此時安在陛下倉皇西出內官奔命東來黎庶盡被殺傷衣冠悉遭屠戮今則園陵開毀宗廟荆榛遠近痛傷遐邇嗟怨雖然奸臣未悟陛下猶迷不思宗廟之焚燒不痛園陵之開毀臣之痛也實在於斯此事見之多年不獨知於今日況自崔蒲盜起朝廷徵用

至多上至帥臣下及裨將以臣所料悉可坐擒用此爲謀安能辦事陛下今用王鐸盡主兵權誠知狂寇必殲梟巢即覆臣讀禮至宣尼射於矍相之圃蓋觀者如堵牆使子路出延射曰賁軍之將亡國之大夫與爲人後者不入於射也嚴誠如斯圖功也豈宜容易陛下安忍委敗軍之將陷一儒臣崔安潛到處貪殘只如西川可爲驗矣委之副貳詎可平戎況天下兵驕在處僭越豈二儒士能戢強兵萬一乖張將何救助願陛下下念黎庶上爲宗祧無使百代有抱恨之臣千古留刮席之恥臣但慮寇生東土劉氏復興即軹道之災豈獨往日乞陛下稍留神慮以安宗社今賢才在野憮人滿朝致陛下爲亡國之君此等計將安出伏乞戮賣官鬻爵之輩徵鯁直公正之臣委之重難置之左右剋復宮闕莫尚於斯若此時謗誹忠臣沈埋烈士匡復宗社未見有期臣受國恩深

不覺語切無任憂懼之至

代青州掌記謝本府辟啟

某啟今月日衙前虞候某乙齎到簡牒伏蒙召署節度掌書記者伏以記室司存雄藩重務吳中草檄始召陳琳鄴下裁牋方徵阮瑀咸持彩筆以掌軍書況地控全齊封連巨浸有外夷之琛賁多上貢之賦輿假道既繁飛章亦衆永言斯任宜委高才且某徒效聚螢未嘗吐鳳讀傳而雖云成癖爲文而未見愈風忽辱簡書遽蒙辟召捧函增懼撫己知歸遐想膺門已積糜軀之志仰瞻龍節空懷拜賜之誠

投顧端公啟

某啟某聞三吳詞苑不乏家聲兩晉儒林非無祖德洎風流寢薄簪紱漸稀將闡吾宗獨付全德不依華宇更託何門某遠派涓流寒林一葉學由耕石才實鏤冰爰自隨計遐方觀

光上國難沽聲價易掇羈愁出谷風高先摧弱羽登門浪急  
預返窮鱗伏念一擲魚竿四環星瑄華髮灑倚門之淚遠書  
開隔歲之緘而又曾棄關繻空歸未得已隨律柱捨此何之  
今則漸逼春期將臨試藝彎弧乏勇睇鵠增憂伏以端公三  
翁德服儒流言爲訓詁蕘枯有術肉骨多方儻蒙少借餘波  
微迴誕說當見長房之竹亦可爲龍則知莊叟之魚終能化  
羽輕瀆尊聽伏積憂惶延望清塵不勝翹企

代人上路相公啟

某啟某本異仙才又非良器叨因射策偶忝決科始脫麻衣  
纔沾斗粟方期清慎稍竊寵榮無何不善攝生遽沈痼疾懸  
蛇結鬻鬪蟻成災針石屢加駑羸無減並相如患渴雖覺有  
瘳比元晏病風猶稀可療實以彌年伏枕終日閉關嬰幼素  
多饘餬莫給腸然烈火鬢染繁霜分無榮達之由敢望陶鎔

之力家室以幸聯姻戚合候起居伏蒙特軫襟靈深垂顧問  
咨嗟生業憫惻羈危許以轉銜致諸外府側聆嘉命寂聽好  
音扶策病躬開張淚目仰希尊旨如釋沈疴拜賜猶賒銜恩  
欲泣望朱門而尚遠銘丹慊以先深必也果踐玉書不移金  
諾資糧有羨藥餌無虞然後訪三世之名醫求千金之顯效  
獲離枕席再服冠纓維此昇沈實繫恩德困而待問希同喘  
路之牛誓此酬恩願比棲囊之雀謹專奉啟起居陳謝

投戶部裴德符郎中啟

某啟某聞放龜者無心覓印養雀者微意求環蓋由仁發於  
誠惠加於物因懷感激遂效禎祥若某者泳沼未期傷弦有  
日仰恩波而尚遠指雲路而猶賒欲望生成猶希憫惻實以  
才非辯鵲道異猶龍四海投知希逢厚遇二年求試未過先  
場撫螢窗而便欲灰心對鷺花而徒傷淚目加以秦吳路阻

煙水程遙甘滑多違問安實闕中宵夢到星漢俄沈萬里書  
迴槐檀遽改而又偶師題柱竊學棄繻明未達而不還亦捨  
此而何適伏以曾將薄技叨忝殊私倘蒙尚憫枯鱗猶傷塌  
翼纔露末薦便是深恩縱不能生報田文亦當死酬宣子傾  
心企望瀝懇依投圓蓋低臨方輿上載苟違斯語請告神明  
謹啟

投殿院韋侍御啟

某啟某聞干時妄動君子不爲小智大謀兵家所忌進憂狂  
狷退恥敗亡詳觀躁靜之機爰契軍戎之事聊因牋簡假喻  
師徒冀憑殷氏之函用代秦庭之泣某名同膠柱用等鉛刀  
不思量力而行竊欲爭鋒而進洎焚舟學海決戰名場衷甲  
不堅心城匪固兩經先榜但潰楚師再犯終場亦班齊騎雄  
鋒缺落銳志銷磨執金鼓以無因送降旗而不暇李陵矢盡